

Angajoqqaat meeraasa amerlassusaat naapertorlugu akileraartarnikkut ilanngaateqalerunik inuiaqatigiinni amerliartuaarnissamut iluaqutaasinnaanersoq pillugu apeqquteqaat aallaavigalugu oqallisssiassatut siunnersuut.

(Inatsisartunut ilaasortaq Aqqalu C. Jerimiassen, Atassut)

Akissuteqaat

Siullermeerneqarnera

Naalakkersuisut aallaqqaasiullugu, Aqqalu C. Jerimiassenip apeqquteqaat aallaavigalugu oqallisssiassatut matuminnga siunnersuuteqarnera qujaffigissavaat. Naalakkersuisut pingaartippaat, politikkikkut aalajangiusimaneqassasoq, ilaqutariit meerartallit toqqissisimanartumik aamma qajannaatsumik aningaasaqarnikkut sinaakkuteqarnissaasa pilersinneqarnissaat ukkatarineqassasoq.

Naalakkersuisut nakimanatik isumaqarput, ataasiakkaanut kiisalu inuiaqatigiinnut nuannaarutaasortoq, angajoqqaat meerartaassallutik ataatsimut aalajangeraangata. Tamanna aamma aalajangiineruvoq, ataasiakkaat ineqarnikkut atugaqarnerannut, ulluunerani paaqqinnittarfinni pissutsinut aamma sulinerup inuunerullu oqimaaqatigiissaarneranut kiisalu aningaasaqarnermut sunniuteqartartoq.

Naalakkersuisulli aamma oqaatigissavaat, angajoqqaanut akileraartarnikkut ilanngaasiineq ilaqutariit meerartallit aningaasaqarnerannik nukittorsaanissamut periusissaq pitsaanerpaajunngimmat. Naalakkersuisut taamaasillutik ilisimannngilaat misissuinerit, akileraartarnikkut ilanngaasiinerit imminermiini ataavartumik kiisalu uuttortarneqarsinnaasumik inunngortartut amerlassusaannut sunniuteqarsinnaaneriniq oqariartuuteqartut.

Suliniutilli aningaasaqarnikkut nalinga naatsorsoruminaassinnaavoq, suliniut taamaattoq ilaqutariinnut, pisuni suniluunniit meerartaartussanut, aaqqiissutip ataatsimut isigalugu inuiaqatigiit ineriartornerannut allannguiffiginngisaanut aamma iluaqutaasussaammat.

Akileraartarnikkut ilanngaasiinermik ilusiliaq pingaarnertut ilaqutariinnut akunnattumik aamma qaffasissumik isertitaqartunut iluaqutaassaaq, taamaattumillu aningaasaqarnikkut naligiinnginnermik annertusaassalluni. Angutit arnanit isertitaqarnerukkajuttarmata, aaqqiissut aamma naligiissitaanikkut equngasumik kinguneqassaaq, ileqqutoqqat malillugit pilersueriaatsit attannerisigut.

Naggataagut meeqqamut ataatsimut nalinginnaasumik akileraartarnikkut ilanngaasiineq iluanaarutissatigut annertuumik aamma ataavartumik kinguneqassaaq, sumiiffinni allani sipaarniarnikkut imaluunniit akileraarutiniq qaffaanikkut aningaasalersorneqartussanik.

Naalakkersuisut nalilerpaat, meerartaarnissamut aalajangerneq annertunerpaatigut aaqqissuussaaniikkut pissutsinit soorlu ineqarnermik, ulluunerani paaqqinnittarfinnik,

ilinniagaqarnermik aamma ulluinnarni toqqissisimanermik sunnerneqarnerusartoq, akileraartarnikkut ilanngaatsinneqarnissamut periarfissamut sanilliullugu.

Meeqqanut tapiissutit pillugit Inatsisartut inatsisaanni meeqqanut tapiissutit meeqqamut tunniunneqartarput, tapiissutillu atorunnaassapput, isumaqatigiissut atuuttoq angajoqqaanut aningaasat annertussusaat aalajangersimasooq qaangerpagu. Inatsisartut ilaqutariit meerartallit aningaasaqarnerannik nukittorsaanissamik suliaqarnissartik kissaatigippassuk, Naalakkersuisut kajumissaatigissavaat meeqqanut tapiissutini inatsisinik allannguinnissap isumaliutiginnissaa, akileraartarnermik suliaasaqarfik aqqutigalugu aqqiisummik nutaamik ukkatarinninnermut taarsiullugu. Tamanna ajornartorsiummut suliniut sunniuteqarnerullunilu erseqqarinnerussaaq. Tunngaviusumik taamaasilluni akileraartarnermik aqqiisussinerup akileraarutini akiliisitsinnermut atorneqarnissaa tulluarnepaavoq, kiisalu politikikkut soqutigisanik allanik siuarsaanissamut tulluannginnerulluni.